

Como recuerdo pa Sumo Pontifice:

Potret di Capel di Alto Vista di Ayrton Tromp a keda colga den Vaticano



ORANJESTAD (AAN) – Minister Plenipotenciario sr. Guilfred Besaril, den conferencia di prensa, a menciona cu ademas di un sous di papaya cu a duna Papa Francisco como recuerdo di Aruba, y cu el a pidi su asistente pa pone hunto cu su cena e mesun dia ey, a entregue tambe un cuadro hopi simbolico y spiritual.

Ta trata di un cuadro di e Capel di Alto Vista, di e fotografo-artista Ayrton Tromp. Minister Plenipotenciario a menciona cu e tabata tin e honor di entrega e cuadro aki, den nomber di pueblo di Aruba, na Papa Francisco.

El a gradici tambe e Plataforma COTAL cu e ta mire como un inicio di un trabao arduo cu ta spera Aruba, pa diversifica e turismo internacional di nos pais.

Seguidamente el a introduci sra. Vicky Perez, representante di COTAL y e hoben Ayrton Tromp. E dignatario a subraya cu esaki ta e prome biaha den 60 aña di e organizacion aki cu Aruba tin un representacion. Tambe a gradici e hoben artista pa su talento. E mandatario a bisa cu e talento hoben aki tambe ta representa e dinamismo di un Gobierno hoben cu kier lo mihor pa su pais.

ARUBA CU STUL DEN DIRECTIVA COTAL

Sra. Vicky Perez a tuma palabra y a expresa cu esaki ta un proyecto den cual nan a traha durante un aña unda nan a logra cu Aruba a bay bishita pa prome biaha den su historia, e Papa na Roma.

Tambe e prome biaha cu un Sumo Pontifice, den e caso aki Papa Francisco, a bendiciona Aruba su bandera. Algo sumamente special y un alegria inmenso, e dama a subraya, ora cu e minister a duna e cuadro di Ayrton y tambe e sous di papaya na e Papa y cu e mes a bisa cu e

kier purbe.

Vicky Perez a expresa cu ora e Oficina di COTAL ta traha den cualkier lugar di mundo, semper nan tin Aruba den nan curazon.

COTAL ta e Confederacion di Operadornan Turistico di America Latina, y nan a logra pa prome biaha un represen-

tacion pa Aruba, pero tambe cu awor Aruba tin un stul den e Hunta Directiva di COTAL, locual ta un logro grandi pasobra nan tin dos aña trahando cu e Confederacion.

El a subraya cu na America Latina e Confederacion aki tin un poder basta grandi, cu tambe ta pertenece na e Organizacion Mundial di Turismo. Aworaki, Aruba como pais tin un voz y un voto hopi mas grandi den e Confederacion unda no solamente por haci turismo estrategico, pero tambe por haci mercadeo y mas publicidad di nos Isla den e paisnan di America Latina unda ainda Aruba no a wordo acerca. Esaki ta un di e obhectivonan mas grandi cu tin cu COTAL, sra. Perez a indica.

CAPEL DI ALTO VISTA LUCIENDO DEN VATICANO: Di su banda e hoben Ayr-



ton Tromp a gradici Minister Plenipotenciario Besaril pa su confianza. El a expresa cu na Aruba ta hopi dificil pa crece como un artista. Aruba tin hopi talento y pesey nunca el a pensa cu algun dia, un di su potretnan lo bay wordo colga den Vaticano, y esaki ta un logro masha grandi pe. El a in-

dica cu e no ta un logro grandi pe como un hoben, pero un logro grandi pa Aruba. El a gradici tambe tur persona local y internacional cu a reacciona riba e evento aki y e ta spera cu esaki no ta e ultimo oportunidad cu Aruba haya pa bishita Vaticano, pasobra e ta algo hopi great.